



**Ikatulong Dominggo  
sa Pagkabanhaw  
May 4, 2014**

**Ma-Dominggong Tamdanang Liturhikal alang sa  
Simbahan sa Kabus sa Diwa sa Bag-ong Ebanghelisasyon**

**A**ng Simbahan sa Kabus, pinaagi sa Gagmayng Simbahanong Katilingban, mas lawom nga makaila sa Ginoo pinaagi sa malipayong pagpuyo sa bag-ong kinabuhi, dinasig sa Balaang Kasulatan, gimatuod sa mga buhat ug gisaulog sa Eukaristiya ug sa mga sakramento.

Sa mapadayonong pagtagamtam sa kalipay sa Pagkabanhaw tungod sa bag-ong kinabuhi nga gituga kanato sa atong Nabanhawng Ginoo, ipadayon usab nato ang pagpamalandong bahin sa konteksto sa atong gipanag-ambitang misyon sa Ebanghelisasyon. Bahin sa relihiyosong konteksto sa atong misión sa Ebanghelisasyon, mao kini ang gisulti sa PKP-II:

**(29)** “Karon ato na usab tan-awon ang atong kaugalingon isip Simbahan. Ug mangutana kita: Asa na man kita karon atubangan sa mga kamatuoran sa atong panahon – isip mga obispo ug mga pari, isip relihiyoso, isip mga layko? Unsay masulti sa atong hiniusang pagtoo – ug mahimo – ngadto sa Pilipinas ug sa kalibutan karon?”

**(30)** Isip mga klerigo, ug makalolooy na intawon ang atong ihap nga mohatag ug pag-alagad sa atong katawhan nga ila ra ba gayong katungod, dili kanunay tinaw alang kanato kon unsay padulongan sa pagpangulo sa Simbahan, ug unsaon

**RITO SA PAGSUGOD**

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Kalinaw sa Nabanhawng Ginoo maanaa kaninyo.

K: *Maanaa usab kanimo.*

niya kini pagbansay. Isip mga relihiyoso, nahasol kita sa kakulang sa atong pagsaksi sa kinabuhing konsagrado diha sa mga halisud nga kahimtang sa pagpuyo sa atong katawhan karon. Isip mga layko, bisan tuod nagkataas ang atong kaamgohan bahin sa makabuhing papel nato sa Simbahan, modakin-as gihapon kita, ug dili kaayo tataw alang kanato kon unsa ba gayud ang gikinahanglan sa nagbag-ong panahon gikan kanato.

**(31)** Kitang tanan manununod sa atong kagahapon. Nabug-atan kita sa iyang mga kasaypanan ug mga kaparotan, sa iyang mga kasipyat, ug mga kahigayonang wala mahupti. Apan gibendisyonan kita sa iyang bahandianong kabilin ug kusog sa pagtoo. Gitugahan kita sa kasayong mopahiluna sa atong mga kagikan. Ug mas nidaghan ang katawhan nga niining ulahing mga panahon nagpili sa ilang mga bokasyon ug karera sa pag-alagad, sulod ug gawas sa Simbahan. Busa makapadayon na kita sa paglihok padulong sa kalamboan. Ug kon buot kitang molihok padulong sa kalamboan.”

Usa kini ka mapaubsanong baruganan nga giangkong sa Simbahan sa Pilipinas mahitungod sa iyang kaugalingon. Mag-ampo kita nga ato untang makanunayong iduso ang atong kaugalingong pagbag-o ug ang atong buhing pagsaksi sa Diyos nga atong gitoohan. ■

## **Pasiuna ug Pag-abi-abi**

Mga minahal kong mga igsoon: ipadayon nato ang pagtagamtam sa kalipay sa Pagkabanhaw ug sa bag-ong kinabuhi nga gigasa kanato sa atong Nabanhawng Ginoo. Barugan nato ang atong pagkatawo, lalaki man o babaye nga gikan sa nagkadaiyang dagan sa kinabuhi ug pangidaron, tingali nalubong ngadto sa sala, apan sa kanunay gidapit sa Diyos sa pagkaplag pag-usab sa iyang gugma ug kalooy sa makausa pa.

## **Akto sa Paghinulsol**

P: Mga igsoon, aron maandam kita sa pagsaulog nga angayan niining mga balaang misterio, atong dawaton ang atong mga kasal-anan, ug pangayoon ta sa Diyos ang iyang pasaylo ug kalig-on. P: Nagakompisal ako..

*K: Sa Dios makagagahum sa tanan, ug kaninyo, mga igsoon..*

P: Kaloy-an unta kita sa Dios...ngadto sa kinabuhing dayon.

*K: Amen.*

P: Ginoo, kaloy-i kami.

*K: Ginoo, kaloy-i kami.*

P: Kristo, kaloy-i kami.

*K: Kristo, kaloy-i kami.*

P: Ginoo, kaloy-i kami.

*K: Ginoo, kaloy-i kami.*

## **Himaya sa Diyos didto sa langit...**

### **Kolekta**

P: Mag-ampo kita: Maghimaya unta ang imong katawhan hangtud sa kahangtoran, O Diyos, sa nabag-ong pagkabatan-on diha sa Espiritu, aron, hinambin ang kalipay karon sa nahiuling himaya sa among pagkasinagop, pagalantawon unta namo uban sa masaligong paglaum ang kalipay sa adlaw sa pagkabanhaw. Pinaagi sa among Ginoong Jesukristo Imong Anak, nga buhi ug hari uban Kanimo diha sa kahiusahan sa Espiritu Santo, Dios nga usa, hangtud sa kahangturan.

*K: Amen.*

## **LITURHIYA SA PULONG**

### **Unang Pagbasa: Buhat 2:14,22-23**

L: Ang pagbasa gikan sa Mga Buhat sa mga Apostoles.

(Basahon gikan sa Kasulatan)

L: Ang Pulong sa Ginoo.

*K: Salamat sa Dios.*

### **Komentaryo sa Buhat 2:14,22-23:**

Mao kini ang pagsaksi ni Pedro bahin kang Jesus. Giasoy kini sa adlaw sa Pentekostes, kining pagsaksi maoy kutay sa mga linugdangan sa pagkunsad sa Espiritu Santo gikan sa pagsinabtanay sa katawhan nga lain-lain ug mga sinultihan ug sa bag-ong kinabuhi nga ilang pagapuy-an nga komun o hiniusa. Si Kristo nga Nabanhaw maoy hinungdan ngano nga nagkasinabtanay ang mga katawhang lain-lain ug sinultihan hangtud nganong gipuy-an nila ang bag-ong kinabuhi nga maalampon, nga nanagpuyo nga komun uban sa mga kabus, ug nanagsaulog sa Eukaristiya. Kining Kristong Nabanhawng gisakit, namatay ug nabanhaw dinhi sa yuta. Siya ang Mesiyas nga naghingpit sa mga gipaabot sa Israel. Kitang midawat kaniya ug naglakaw sa dalan sa kinabuhi nga iyang gipakita makaambit uban kaniya sa kalipay sa iyang presensya ug paglaom sa pag-ambit sa iyang kinabuhing tunhay.

### **Salmo Responsoryo: Sal 16:1-2, 5, 7-8, 9-10, 11**

(Basahon gikan sa Kasulatan)

### **Komentaryo sa Sal 16:**

Gipadayag sa salmista ang iyang tibook nga pagsalig ug pagpiyal sa Diyos, ang bugtong magbubuhay sa tanang maayo. Ang Ginoo mao ang iyang magtatambag ug ang tigtultol; ang iyang makanunayong presensya naghatag ug kasegurohan ngadto sa salmista sa kaluwasan gikan sa kamatayon.

Busa, ang salmista, nga nakahibalo sa presensyang magtutol sa Diyos, mibuto sa kalipay.

### **Ikaduhang Pagbasa: 1 Ped 1:17-21**

L: Ang pagbasa gikan sa Unang Sulat ni San Pedro.

*(Basahon gikan sa Kasulatan)*

L: Ang Pulong sa Ginoo.

K: *Salamat sa Dios.*

### **Komentaryo sa 1 Ped 1:17-21:**

Gipaila ni Pedro ang hustisya sa Diyos isip tulubagon sa langit, ug ang responsabilidad sa matahurong batasan sa mga tawo samtang nagalakaw sila dinhi sa yuta. Sa diwa sa bunyag nga naangkon sa katawhan, angayan lamang nga puy-an nila ang bag-ong kinabuhi sa paaging lahi sa pagpuyo sa karaan. Ang inang-ang nga pagpaila sa Diyos sa iyang kaugalingon gipaagi man sa pagkatawo ug kinabuhi ni Jesus nga uban kanunay sa Diyos bisan pa sa sinugdanan. Ang sukaranan niining maong pagtoo ug paglaum mao ang pagkabanhaw ni Jesus nga mao usab ang iyang himaya!

### **Berso sa Aleluya:**

T: **Aleluya, aleluya.**

T: **Aleluya, aleluya.**

### **Ebanghelyo: Lukas 24:13-35**

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo Sumala ni San Lukas.

K: *Himayaon ikaw, O Ginoo.*

*(Basahon gikan sa Kasulatan)*

P: Ang Ebanghelyo sa Ginoo.

K: *Daygon Ikaw, O Kristo.*

### **Komentaryo sa Lukas 24:13-35:**

Inilang sugilanon kini nga Dalan sa Emmaus. Adunay panaglahi ang panaw ni Jesus sa panaw sa duha sa iyang

mga disipulo. Ang panaw ni Jesus natapos nga nahingpit ang makaluwas nga kabubut-on sa Amahan, apan ang panaw sa duha ka disipulo nahulog sa paglingla, kasubo ug kawalay-pulos. Paminawa kining pagka-walay pulos: “Apan naglaum kami nga siya man unta ang motubos sa Israel.” Apan alang sa mga disipulo niadtong panahona, ang kinabuhing gisakit alang sa pag-alagad sa uban, ang gugmang nagpakamatay alang sa hinigugma, ang kadaugan sa pagkabanhaw ni Jesus batok sa kamatayon, dili pa mao ang tininuod nga dalang alternatibo. Aron molugdang kining alternatibong pamaagi sa pagpuyo, duha ka butang ang gihimo ni Jesus: (a) ang pagpasabot sa Kasulatan hangtud masabtan kini pag-ayo, ug (b) ang pagbuhat sa Kasulatan isip uyukang dagang sa pagsabot niini – ang paglihok. Mao man gani nga gidapit sila ni Jesus sa usa ka kaon, nga maoy misumada sa makaluwas ug manluluwas nga katilingban sa gugma ug pagtahan sa kaugalingon. Samtang kini kasinatian sa duha ka disipulo, ug unya sa katilingban sa mga disipulo, nag-ingon kanato si Lukas: mao usab kini ang atong dalan ug ang atong tininuod nga panaw uban ni Jesus sa atong panahon: ang pagsabot sa Kasulatan dili mahimong bulagon sa buhat sa pagluwas ug katilingbang makaluluwas sa gugma ug pagtahan sa kaugalingon, bisan pag sakiton kita ug mamatay, alang sa hustisya, kalinaw ug integridad sa mga binuhat!

U bani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**.

o pinagi sa inyong smartphone o tablet i-swipe kini nga QR code.



**Wali: Ang Simbahan sa Kabus, pinaagi sa Gagmayng Simbahanong Katilingban, mas lawom nga makaila sa Ginoo pinaagi sa malipayong pagpuyo sa bag-ong kinabuhi, dinasig sa Balaang Kasulatan, gimatuod sa mga buhat ug gisaulog sa Eukaristiya ug sa mga sakramento.**

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/ Panawagan/ Hagit
<p>Ang Simbahan sa Kabus, pinaagi sa Gagmayng Simbahanong Katilingban, mas lawom nga makaila sa Ginoo pinaagi sa malipayong pagpuyo sa bag-ong kinabuhi, dinasig sa Balaang Kasulatan, gimatuod sa mga buhat ug gisaulog sa Eukaristiya ug sa mga sakramento.</p>	<p>Hinganli ang mga timailhan sa malipayong pagbag-o sa kinabuhi nga anaa sa inyong GSK. Nganong bag-o ug malipayon man ni sila? Unsa may mga sukaranan niini sa bibliya? Giunsa man niini pagpahitabo nga epektibo? Giunsa man niini pagsalamin sa mga kasaulugan sa sakramento ug sa Eukaristiya?</p>	<p>Diha ni Jesus, ang Gingharian sa Ginoo gisang-yaw pinaagi sa pulong ug sa buhat. Nadawat sa Simbahan kining balaanong kabilin: gitultolan kita niya ngadto kang Jesus ug sa iyang Gingharian pinaagi sa Pulong sa Diyos ug sa buhat sa Katilingban sa gugma ug hustisya.</p>

**Padayag sa Pagtoo**

P: Nagatoo ako...

K: ...Sa Dios ang Amahan ang makagagahum sa tanan, Magbubuhat sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay.

Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

**Mga Katilingbanong Pag-ampo**

P: Mga hinigugma kong mga igsoon, malipayon kitang mohangyo sa atong Amahan ug mga grasya nga atong gikinahanglan isip iyang mga anak. Sa mata'g pag-ampo, kita motubag: Ginoo, hatagi kami sa kalipay sa bag-ong kinabuhi.

**T: Ginoo, hatagi kami sa kalipay sa bag-ong kinabuhi.**  
 L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagsangyaw sa gasa sa Pagkabanhaw sa bag-ong kinabuhi nga malipayon, maalampong pasalamat ug epektibong buhat sa panaghiusa. Mag-ampo kita sa Ginoo.

**T: Ginoo, hatagi kami sa kalipay sa bag-ong kinabuhi.**  
 L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ila untang ipadayon ang pagtukod ug mga programang pastoral nga nagtukmod sa maalampong pagbasa ug pagtuon sa pulong sa Diyos, sa katilingbanong kahimtang sa katawhan, ug epektibong paglihok isip tubag sa gugma ug solidaridad nga gisaulog sa Eukaristiya ug mga sakramento. Mag-ampo kita sa Ginoo.

**T: Ginoo, hatagi kami sa kalipay sa bag-ong kinabuhi.**  
 L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang ituboy ang paggambalay sa

kalinaw pinasikad sa hustisya, mutualidad ug panag-uli sa mga kanasuran, ug panagsabot alang sa kalinaw ug pagsulbad sa mga bata kang panagbangi sa mga nasud nga gikusokuso sa gubat ug kabangis sa inhustisya. Mag-ampo kita sa Ginoo.

**T: Ginoo, hatagi kami sa kalipay sa bag-ong kinabuhi.**

L: Alang kanatong tanan, mga lumulupyong sa kalibutan ug sakop sa kalangitan: nga ato untang ugmaron ang mga bili nga mopatigbabaw ug manalipud sa kinabuhi gikan sa sabakan hangtud sa kamatayong natural, sa banay ug kinabuhi sa banay sa tanan niyang hulagway, sa panaghigalaay ug panagsilinganay, sa katilingbanong pagpakabana ug pag-apil. Mag-ampo kita sa Ginoo.

**T: Ginoo, hatagi kami sa kalipay sa bag-ong kinabuhi.**

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

**T: Ginoo, hatagi kami sa kalipay sa bag-ong kinabuhi.**

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) .... Mag-ampo kita sa Ginoo.

**T: Ginoo, hatagi kami sa kalipay sa bag-ong kinabuhi.**

P: Ginoo, salamat kayo sa paghigugma mo kanamo ug sa paggasa mo kanamo sa katakus sa paghigugma kanimo. Kami ang katawhan mong nanginahanglan, busa nangayo kami kanimo sa mga bendisyon nga ikaw lamang ang makahatag. Kini among gipangayo pinaagi ni Kristo atong Ginoo.

*T: Amen.*

## LITURHIYA SA EUKARISTIYA

### Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining

among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

*K: Daygon ang Dios hangtod sa kahangturan.*

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.'

*K: Daygon ang Dios hangtod sa kahangturan.*

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

*K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.*

### Pag-ampo Alang sa Mga Halad

P: Dawata, O Ginoo, naga-ampo kami, kining mga halad sa imong Simbahang malipayon, ug, samtang imong gihatag kaniya ang hinungdan sa tumang kalipay, itugot usab nga ang mga gasang among dalhon mobunga unta ug kalipay nga walay katapusan. Pinaagi ni Kristo among Ginoo.

*K: Amen.*

### Prepasyo

P: Ang Ginoo maanaa kaninyo.

*K: Maanaa usab kanimo.*

P: Ibayaw ang inyong mga kasingkasing.

*K: Amo nang gibayaw ngadto sa Ginoo.*

P: Magpasalamat kita sa Ginoong atong Dios.

*K: Angay ug matarong.*

P: Angay ug matarung gayud, sibo ug makaluwas, kanunay ug sa tanang dapit



apan ilabi na gayud niining panahona, O Ginoo, nga dayegon ikaw sa tumang paghimaya, kay si Kristo nga among Pasko nahalad na man.

Kay wala gayud siya mohunong sa paghalad sa iyang kaugalingon alang kanato ug pagpanalipud kanato ug kanunay nagaampo alang sa among mga tinguha sa imong atubangan; siya ang Biktimang giula nga dili na mamatay, ang Kordero nga makausang gipatay, ug buhi hangtud sa kahangturan.

Busa, puno sa kalipay sa pasko sa pagkabanhaw, ang mata'g yuta, ang mata'g katawhan nagadayeg sa imong himaya ug bisan gani ang mga gahum sa kalangitan, uban sa mga panon sa mga anghel, nagadungan sa pag-awit sa walay katapusan imno sa imong himaya, sa ilang pag-ingon:

### **Santos**

*K: Santos, Santos, Santos nga Ginoo, Dios sa kagahaman. Punong ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.*

### **Pag-ampo sa Eukaristiya**

*(Human sa konsagrasyon, ang aklamasyon:)*

P: Kini ang misteryo sa pagtoo.

*K: Luwasa kami, O Manluluwas sa kalibutan, kay pinaagi sa imong Krus ug Pagkabanhaw, gihatagan mo kami'g kagawasan.*

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

*K: Amen.*

### **Rito sa Pangalawat**

P: Karon mag-ampo kita sa Amahan,

atong gamiton ang mga pulong nga gitudlo kanato sa atong Manunubos.

*K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalanon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoo luwasa kami sa dautan.*

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

*K: Kay imo man ang gingharian/ ug ang gahom ug ang himaya/ hangtod sa kahangturan.*

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

*K: Amen.*

P: Ang kalinaw sa Ginoo sa kanunay maanaa kaninyo.

*K: Maanaa usab kanimo.*

P: Ipakita ta ang atong panaginigsoonay.

### **Kordero sa Dios**

*K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.*

### **Pangalawat**

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: *Ginoo, dili ako angay nga mokalawat kanimo, apan ipamulong lamang ug mamaayo ako.*

### **Pag-ampo Human sa Pangalawat**

P: Mag-ampo kita: Tan-awa nga maloloy-on ang imong katawhan, O Ginoo, ug itugot, nagahangyo kami, nga sila nga nahimut-an nimong bag-ohon pinaagi sa mga mysteryong walay katapusan makakab-ot unta pinaagi sa ilang unod ang dili madugtang himaya sa pagkabanhaw. Pinaagi ni Kristo among Ginoo.

K: *Amen.*

### **Katapusang Panalangin:**

P: Ang Ginoo maanaa kaninyo.

K: *Maanaa usab kanimo.*

P: Moduko kita ug atong dawaton ang bendisyon sa Ginoo: Ang Diyos, kinsa pinaagi sa Pagkabanhaw sa iyang Bugtong Anak nahimuot sa paghatag kaninyo sa gasa sa kaluwasan ug pagkasinagop, magahatag unta kaninyo ug kalipay pinaagi sa iyang mga panalangin.

K: *Amen.*

P: Hinaut nga siya, kansang buhat nga makaluwas nakahatag kaninyo'g gasa sa kagawasang walay katapusan, maghimo unta kaninyo nga mga manununod sa kabiling walay katapusan.

K: *Amen.*

P: Ug hinaut nga kamo, nga nabanhaw na uban ni Kristo diha sa Bunyag pinaagi sa pagtoo, sa inyong pagpuyo nga husto dinhi sa kalibutan, mahiusa unta uban kaniya didto sa puluy-anang langitnon.

K: *Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo

kanunay.

K: *Amen.*

### **Pagpanglakaw**

P: Panglakaw kamo ug himayaa ang Diyos sa inyong kinabuhi, aleluya, aleluya.

K: *Salamat sa Dios, aleluya, aleluya.* ■

**Ang Simbahan sa  
Kabus, pinaagi sa  
Gagmayng  
Simbahanong  
Katilingban, mas lawom  
nga makaila sa Ginoo  
pinaagi sa malipayong  
pagpuyo sa bag-ong  
kinabuhi, dinasig sa  
Balaang Kasulatan,  
gimatuod sa mga buhat  
ug gisaulog sa  
Eukaristiya ug sa mga  
sakramento.**

Please help us continue publishing  
this Missalette with your donation.

Any amount is appreciated  
no matter how small.

Thank you!

Account Name:  
Communication Foundation for Asia  
Metrobank V-Mapa, Sta. Mesa,  
Manila Branch:  
SA# 3306-509-480  
BDO Old Sta. Mesa Road, Manila Branch:  
SA# 7090-042-836

Please fax deposit slip to 713-2736  
We are located at # 4427 Old Sta. Mesa St.,  
Sta. Mesa, Manila